

Evangelium vum 3. Sonndeg vun der Ouschterzäit A-B-C

Joh 21, 1-14

{{{KONTEXT}}}

Hei si mer elo ganz um Schluss vum Joh, nach no dem Epilog vu Joh 20, 30-31 (cf. 2. Sonndeg vun der Ouschterzäit C). Et gëtt ugeholl, datt entweder de Joh (= deen, dee schlussentlech d'Joh néiergeschriwwen huet ënnert dier Form wéi mär et kennen, minus d'Kapitel 21) selwer oder awer senger Schüler et fir néideg fonnt hunn dëst Kapitel nach un d'Kapitel 20 drun ze hänken. A wann een den Text vu méi no kuckt kann ee verstoen, firwat, zëmools wann een drun déinkt, datt dem Joh seng Chrëschtengemeinschaft mat zimlech ville Probleemer, interner, wéi och no baussen, ze kämpfen hat.

{{{TEXT}}}

De Jesus huet sech de Jünger beim Séi vun Tiberias ... (V. 1) :

(‘No deenen heite Saachen’ oder méi einfach ‘hei no’ ass am liturgeschen Text vum V. 1 ewechgelooss.) – Déi Erzielung, déi elo kënnert zimlech u Lk 5, 1-11 (ass awer mat anere Fiedem gestréckt) an u Lk 24, un d’Jünger um Wee fir op Emmaüs. – D’Synoptiker schreiwe ‘Séi vu Gennesareth’, de Joh (Joh 6, 1.16 an hei : ass dat en Zoufall ?) de réimeschen Numm ‘Séi vun Tiberias’. Mer hunn dräi Fiedem : eng Erscheinung vun deem Operstanenen deen si eréischt vu Wäitem erkennen, vgl. **Vv. 4.7** op eemol fänken si ganz vill Fësch, vgl. **Vv. 3.6** (an hei ass keng Gefor, datt d’Netz rässt cf. **V. 11** an op eemol hunn si z’iessen, wou virdrun näischt war, vgl. **Vv. 5.9**).

De Simon Péitrus, den Thomas, deen Zwilling genannt gouf, ... (V. 2) :

Si sinn zu hirer siwen – a wou sinn déi aner véier ? – Méi wäit am Text (**V. 7**) gi mer gewuër, datt och de Jünger mat deem de Jesus frou war (am Joh de Modell fir all Jünger) mat am Naache war ; hie gëtt hei awer net mat opgezielt.

De Simon Péitrus sot zu hinnen : « Ech gi fëschchen.» Du soten si ... (V. 3) :

De Péitrus schéngt d’Cheferoll iwweholl ze hunn. – Mee, just e puer Verse virdrun haten d’Jünger Hellege Geescht kritt an si waren erausgeschéckt gi fir d’Evangelium ze verkënnegen. – Haten si hiren neien Opdrag éire scho vergiess ? – Hunn se dofir vläicht näischt gefaang ? Oder ass dat just en Element, dat an der Erzielung gebraucht gëtt fir datt se kann zu hire Pointé kommen ?

Wéi et du scho Muerge ginn ass, stoung ... (Vv. 4-5) :

Dës zwee Vv. kréien hiirt Géigegewiicht méi wäit, an de Vv.7.9. ; se erënneren och un d’Jünger um Wee op Emmaüs. – Komesch ass, datt déi siwen, ouni dee Mënsch do ze kennen, deem si mueres fréi begéinen, follegen ouni ze mouken. – A komesch och, datt deen Operstanenen Honger huet (cf. och Lk 24, 30.42) ; hien ass also kee Geescht.

Hie sot zu hinnen : « Geheit d'Netz op där rietser Säit ... (Vv. 6-7) :

Déi riets Säit war fréier déi gutt Säit. – Si sinn no beim Uwenner, an normalerweis fëscht do kee méi, wann d'Sonn bis op ass, well d'Fësch dann an dat déift, kilt Waaser schwammen. – Mee : hiirt Netz ass esou voll Fësch, datt si et bal net méi packen – an elo ass dee Jünger, mat deem de Jesus frou war, méi séier wéi de Péitrus ; hie seet dem Péitrus, an net deenen aneren, seng Erkenntnis (cf. och Joh 20, 4-6). - Do derhannert stécht d'Geschicht vun der joh Gemeinschaft : si hunn sech als lerwe gesi vun deem Jünger, mat deem de Jesus frou war, waren awer op eemol zimlech zersplittert an hiren Iwwerzeegungen, datt hir eenzeg Iwwerliewenschance war, sech un déi an der Tëschenzäit méi grouss a besser organiséiert Chrëschtetegemeinschaft, déi sech als lerwe vum Péitrus ugesinn huet, ze rattachéieren ; och d'Erzielung vun deenen zwou Zorte Schof, Joh 10 weist an déi Richtung) : hien erkennt 'den Här'. – Spontan (esou kréie mer de Péitrus ëmmer erëm gewisen, cf. z. B. Joh 13, 8) spréngt de Péitrus an d'Waasser ; wahrscheinlech aus Respekt deet hien säin Hiem un (obschonn hien da méi schwéier schwëmmt) ; d.h. de Joh seet eis, datt wéi de Péitrus bis erkannt huet, datt de Jesus do war, hien sech an d'Waasser gehäit huet - am iwwerdroene Sënn, wéi mär och haut nach den Ausdrock gebrauchen.

Déi aner Jünger si mam Naache komm ... (V. 8) :

Hei hunn se hir Méi zu sechs mat dem Netz, dat de Péitrus hannenoter (V. 11) eléng zitt.

Wéi si aus dem Naache geklomm an u Land gaang waren ... (V. 9) :

Elo op eemol ass z'iessen do (cf. V. 5), an et ass scho prett (eng Glous brauch jo awer hir Zäit), an awer seet deen Operstanenen, sollen si nach méi Fësch bréngen (V. 10).

De Simon Péitrus ass higaang ... (V. 11) :

Et ass scho (Brout a) Fësch do, de Péitrus soll der awer nach siche goen ; zielt hien se och nach ? – Op jiddfer Fall, kréie mer gesot, et wieren der 153. Iwwert déi Zuël ass scho vill geschriwwe ginn ; plausibel schéngt d'Erklärung beim Kierchepapp Hieronymus : déi Zäit waren déi Geléiert der Meenung, et géifen am Ganzen 153 verschidden Zorte Fësch (firwat, schreiw hien net) ; d. h. de Jesus huet scho Fësch fir ze deelen (am positive Sënn ! = an der Kierch, an der Chrëschtetegemeinschaft si scho Fësch = si scho Leit) ; mee, de Péitrus kritt gesot, hie soll der nach bréngen vun deenen 153, also aus allen Härelänner (och Chrëschten aus der joh Gemeinschaft, aus dem joh Netz), well d'Netz gëtt wuël schwéier, mee de Péitrus packt et an d'Netz hält duër, et rässt, wider Erwaarden, net !

De Jesus sot zu hinnen : ... (Vv. 12-13) :

Hei steet elo d'Brout am Mëttelpunkt ; de Jesus ríft si all fir et ze deelen ; eng Uspilling un d'Eucharistie, wou d'Jünger, d.h. d'Chrëschte wëssen, datt et deen Operstanen ass, deen hinne vum Brout (a vum Fësch) gëtt.

Dat hei war ... (V. 14) :

Dräi ass an der Bibel d'Ziffer vun der Vollkommenheet. – D'Erzielung huet nach eng Suite no dem lessen, wou et nach méi ëmt déi zwou Haaptfiguren (de Péitrus an de Jünger, deen de Jesus gär hat) geet, d.h. ëmt déi zwou Chrëschtetegemeinschaften, déi jiddfereng hire Wee gaange war, a schlussentlech hu missen zesummefannen - wat weder dier enger nach dier anerer Gemeinschaft liicht gefall ass. Mee, et geet, seet den Text, well deen Operstanenen steet derhannert.

(Fränz Biver-Pettinger)